

Newspaper	Utusan Malaysia
Date	21 November 2015

Titian Budaya rai hubungan 50 tahun Malaysia-Singapura

Um - 21/11/2015

KUALA LUMPUR 20 Nov. - Malaysia dan Singapura meraikan ulang tahun ke-50 hubungan kedua-dua negara dengan cara unik apabila menjadikan festival kebudayaan 'Titian Budaya' sebagai jambatan untuk memperkukuhkan hubungan sedia ada.

Festival kebudayaan selama tiga bulan bermula esok itu dianjurkan Kementerian Belia, Komuniti dan Budaya Singapura dengan Malaysia bertindak sebagai tuan rumah bagi menyediakan pentas untuk siri persembahan kebudayaan oleh 400 penggiat seni kedua-dua negara.

Perdana Menteri, Datuk Seri Najib Tun Razak ketika merasmikan Titian Budaya secara bersama dengan rakan sejawatnya dari Singapura, Lee Hsien Loong berkata, program tersebut akan menjadi jambatan sebenar dalam memperkukuhkan hubungan antara dua negara jiran itu.

"Titian Budaya ini akan memberi makna baru kepada hubungan kedua-dua negara yang berkongsi sejarah dan kebudayaan sejak sekian lama. Kita ada persamaan dari segi sejarah dan budaya yang perlu dihargai.

"Saya cukup teruja dengan program ini dan Titian Budaya merupakan jambatan sebenar (yang akan mengeratkan hubungan Malaysia dan Singapura), bukannya jambatan kontroversi," katanya disambut dengan tepukan gemuruh para pegawai kerajaan kedua-dua negara di sini hari ini.

Yang turut hadir isteri Perdana Meq,teri, Datin Seri Rosmah Mansor serta Timbalan Menteri Pelancongan dan Kebudayaan, Datuk Mas Ermieyati Samsudin.



NAJIB TUN RAZAK bersalam dengan Lee Hsien Loong pada pembukaan 'Titian Budaya Art Culture and Exhibition' di Kuala Lumpur, semalam. Titian Budaya memperingati 50 tahun persahabatan antara Malaysia dan Singapura. -BERNAMA

Terdahulu, Hsien Loong dalam ucapannya ringkasnya berkata, langkah menjadikan kebudayaan serta sejarah sebagai tali bagi mengikat Malaysia dan Singapura adalah tepat kerana kedua-dua negara mempunyai banyak persamaan dalam aspek tersebut.

"Malaysia dan Singapura ini boleh diibaratkan seperti 'aur dengan tebing'. Walaupun hubungan kedua-dua negara ini ada fasa pasang dan surutnya tetapi kita tetap terus komited mengekalkan keijasama dalahi hubungan bilateral," katanya.